

SECONDA SESSIONE URDINARIA DI U 2018
2EME SESSION ORDINAIRE DE 2018
RIUNIONE DI I 20 È 21 DI SITTEMBRE
REUNION DES 20 ET 21 SEPTEMBRE

2018/O2/059

*DUMANDA À BOCCA POSTA DA Madama Anne TOMASI
À NOME DI U GRUPPU FEMU A CORSICA*

OGGETTU : Cunvenzione lingua corsa è insegnamentu

O Madama a Cunsigliera Esecutiva in carica di l'insegnamentu,
O Sgiò Cunsiglieru Esecutivu in carica di a lingua,

U 2 di nuvembre 2016, u presidente di l'Esecutivu G. Simeoni, u rettore di l'epica Ph. Lacombe è u prefettu di tandu B. Schmeltz anu firmatu una cunvenzione relativa à u sviluppu di l'insegnamentu di a lingua corsa. L'oggettivi eranu ambiziosi : à l'accorta

- In numeri di zitelli in bislinguu : 2/3 di i zitelli à u primariu, 35% à u collegiu è 20% à u liceu ;
- In quantità d'insegnamentu : almenu 10 ore à simana in lingua corsa ;
- In qualità d'insegnamentu : furmazione di l'insignenti di u primariu è di u secundariu ;
- In insegnamentu di lingua detta regionale : generalizzazione di e 3 ore reglementarie à u primariu, 75% di i zitelli in collegiu è 50% in liceu ;
- In risorse umane : u duppiamentu di u numeru d'insignenti abilitati, un ricruttamentu al minima à a metà di professore di e scole cuncorsu specificu, è tutti i posti frezzati occupati da professori abilitati.

Ancu s'ella ùn rispundia micca à u nostru scopu di generalizzazione di l'insegnamentu in lingua corsa, ss'oggettivi ci parianu un bon principiu, s'è no eramu ghjunti à ste fine in 2021 cum'ella era prevista. Ma, viste e statistiche, ci ghjunghje u penseru... Annu scorsu, 40% di i zitelli du primariu ùn avianu micca e 3 ore prumesse, i tassi di zitelli in bislinguu eranu solu di 40% in primariu, 20% in collegiu è menu di 1% in liceu, sia una crescita di menu di 5% in

generale dappoi u 2016, quand'ella hè stata firmata sta convenzione. Allora, e mo piccule cunniscenze in matematiche mi portanu à dumandammi : cumu fà per ottene una crescita di 20% in 5 anni s'è in dui anni, ùn ci riescimu à francà in 5% ?

In sta convenzione, era dinò quistione in l'articulu 11 di a creazione d'un Cunsigliu Academicu Territoriale, in cogestione frà a nostra Cullettività è u Ritturatu, per seguità a messa in piazza di e pruposte è l'avanzate à u livellu di a quantità cum'è di a qualità di l'insignamentu. Ma per u mumentu, Cunsigliu Academicu Territoriale, ùn ci n'hè ! Ci pudete di induv'è ne sò e dimarchje per a so creazione ?

Per compie, ssi pochi anni, avemu quantunque ottenutu qualchì prugressu da a parte di u Ritturatu : u Grande Pianu di furmazione di l'insignenti di primu gradu è l'agregazione di Lingua Corsa. Ma ancu quessi, ùn ci parenu chè prugressi relativi...

- Ùn n'avemu nisun ritornu d'infurmazione à nantu à l'efficienze effettiva di stu Grande Pianu : hè veramente crisciutu u numeru di professori abilitati di u primu gradu ? È quellu di professori abbastanza cursofoni per assicurà e 3 ore à simana ?
- A convenzione parlava di furmà tutti i professori, quelli di u secundariu dinò. Allora induv'è ne hè a nostra dumanda d'un pianu listessu per i professori di u secundu gradu ?
- Dopu à una prima sessione d'agregazione in 2018, pare chì ùn ci ne sia una seconda in 2019. Cumu si face ?

In fine, tutte ste dumande ùn sò chè conseguenze di a mo dumanda principale : qualessu hè u vostru parè à nantu à e seguite di sta convenzione, è chì mettite in ballu per fà chì l'Educazione Naziunale tenissi i so ingagiamenti ?